

**PENGLIBATAN WANITA DALAM KESALAHAN
MORAL DI BAWAH PERINTAH KANUN
HUKUMAN JENAYAH SYARIAH 2013 DI BRUNEI
DARUSSALAM**

*Norasiah Awang Haji Amal¹
Siti Zubaidah Ismail²*

ABSTRAK

Penglibatan wanita selaku pesalah jenayah merupakan satu polemik yang sentiasa dibincangkan menurut pelbagai perspektif, antaranya dari segi bentuk hukuman, faktor penglibatan mereka, diskriminasi gender dan sebagainya. Dalam konteks jenayah syariah di Brunei Darussalam, sumber rasmi menunjukkan bahawa majoriti pesalah wanita yang terjebak dalam kesalahan jenayah syariah adalah melibatkan kesalahan yang berkaitan dengan moral berbanding dengan berkaitan akidah atau amalan. Sungguhpun demikian, kesalahan moral sebagai kelompok khusus di bawah Perintah Kanun Hukuman Jenayah Syariah 2013 tidak wujud. Tujuan penulisan artikel ini adalah bagi mengkaji tahap penglibatan wanita dalam kesalahan berkaitan moral dan bagaimana hukumannya di bawah peruntukan Perintah Kanun Hukuman Jenayah Syariah 2013. Dengan menggunakan metod dokumentasi dan temu bual, pelbagai penulisan dan kes penghakiman dirujuk bagi mendapatkan data-data yang bersesuaian. Dapatan kajian menunjukkan bahawa adanya beberapa peruntukan kesalahan moral yang melibatkan wanita di mana bentuk

¹ Pelajar Ijazah Kedoktoran, Jabatan Syariah dan Undang-Undang, Akademi Pengajian Islam, Universiti Malaya, 50603 Kuala Lumpur. Email: norasiah.hjamai@unissa.edu.bn.

² Profesor Madya, Jabatan Syariah dan Undang-Undang, Akademi Pengajian Islam, Universiti Malaya, 50603 Kuala Lumpur. Email: szubaida@um.edu.my.

hukumannya masih sama seperti sebelum Perintah Kanun Hukuman Jenayah Syariah, 2013 dilaksanakan. Hasil daripada penulisan ini akan mencadangkan beberapa hukuman alternatif yang sesuai dalam membantu membendung peningkatan kesalahan moral yang melibatkan wanita.

Kata Kunci: Kesalahan moral, Perintah Kanun Hukuman Jenayah Syariah, 2013, Pesalah Wanita

ABSTRACT

Women's involvement as perpetrators of crime is a contentious issue that is frequently debated from a variety of viewpoints, including punishment, factors of their involvement, gender discrimination, and so on. According to government sources, the majority of female culprits caught up in Shariah crimes in Brunei Darussalam are involved in moral offences rather than academic or practical offences. Nonetheless, moral guilt does not exist as a distinct category under the Syariah Penal Code Order, 2013. The purpose of writing this article is to study the level of involvement of women in moral crimes and how they are punished under the provisions of the Syariah Penal Code Order, 2013. Using documentation and interview methods, various writings and judgement cases are referred to obtain relevant data. Studies show that there are several provisions of moral offences involving women in which the form of punishment is still the same as before the Syariah Penal Code Order, 2013 was implemented. The results of this writing will suggest some appropriate alternative punishments to help contain the rise in moral misconduct involving women.

Keywords: *Moral Offences, Shariah Penal Code Order, 2013, Female Offenders*

PENDAHULUAN

Kesalahan moral bukanlah suatu perkara yang asing pada masa kini. Kesalahan ini jika tidak dibendung ianya boleh berada ditahap yang membimbangkan dalam kalangan masyarakat di negara ini. Apa yang lebih membimbangkan lagi adalah jika kesalahan moral tersebut dilakukan oleh wanita. Ini kerana wanita adalah ibu atau bakal ibu yang akan mendidik anak-anak mereka serta generasi akan datang dan mereka haruslah menunjukkan contoh yang baik bagi menerapkan nilai-nilai positif ke atas anak-anak mereka. Melalui kajian ini, kebanyakan kesalahan moral yang melibatkan wanita di negara ini terdiri daripada kesalahan khalwat, hamil luar nikah dan perbuatan tidak sopan.

Menurut statistik Mahkamah Syariah Brunei Darussalam, sebanyak 800 kes kesalahan melibatkan wanita telah didaftarkan dalam tempoh enam tahun kebelakangan.³ Dengan meningkatnya kesalahan yang melibatkan wanita ini, keperluan kepada pembendungan gejala ini perlu ada daripada terus menular. Tambahan lagi, peruntukan undang-undang dalam bentuk hukuman bagi kesalahan-kesalahan am di bawah Perintah Kanun Hukuman Jenayah Syariah, 2013⁴ dilihat masih belum berubah sepenuhnya di mana hukuman bersifat material seperti denda masih menjadi keutamaan di Mahkamah Syariah.

Oleh itu, artikel ini akan mengkaji tahap penglibatan wanita dalam kesalahan moral dan mengenalpasti peruntukan kesalahan dan hukumannya di bawah PKHJS 2013. Beberapa kes melibatkan wanita yang telah dibicarakan di Mahkamah Syariah Brunei Darussalam telah dipilih untuk tujuan ini.

³ Sumber daripada Bahagian Penyelidikan Mahkamah-Mahkamah Syariah Negara Brunei Darussalam diperolehi pada 13 April 2021.

⁴ Selepas ini disebut PKHJS, 2013.

METODOLOGI

Artikel ini menggunakan metod dokumentasi dan temu bual dengan mengumpulkan dan menganalisis laporan kes-kes penghakiman di Mahkamah Syariah Brunei. Perbincangan adalah berkaitan dengan kesalahan moral yang melibatkan wanita serta hukuman yang dikenakan ke atas mereka. Sebanyak 6 kes berkaitan kesalahan moral dari tahun 2017 hingga 2022 dipilih bagi tujuan kajian ini. Kes-kes ini diperolehi setakat mana yang dibenarkan oleh pihak Mahkamah Syariah dan Bahagian Pendakwa Syar'ie untuk tujuan penulisan ini. Kajian juga menemu bual sebanyak tiga orang Hakim Syar'ie di Mahkamah Syariah Brunei bagi mengetahui tahap penglibatan wanita dalam kesalahan moral serta hukuman yang dikenakan ke atas mereka. Pemilihan tiga orang Hakim Syar'ie sebagai responden adalah kerana ketiga-tiga responden ini sahaja yang dibenarkan oleh pihak Pendaftar Mahkamah Syariah untuk ditemu bual.

DEFINISI KESALAHAN MORAL

Perkataan moral berkaitan dengan akhlak seseorang sama ada ianya sesuatu yang baik atau buruk.⁵ Dalam Kamus Dewan, moral bermaksud ajaran atau pegangan tentang buruk baik sesuatu perbuatan (kelakuan, kewajiban, dll), sikap atau cara berkelakuan yang berasaskan atau diukur dari segi baik sesuatu akhlak.⁶

Bila disebut tentang akhlak, Islam menekankan penjagaan akhlak ini dan mengamalkan penjagaannya dalam

⁵ Raihanah Abdullah (1998), Permasalahan Moral Masyarakat Islam Dari Perspektif Undang-Undang, *Jurnal Syariah*, bil. 6, hal. 82.

⁶ *Kamus Dewan*, ed. Ke-4 (Kuala Lumpur: Dewan Bahasa dan Pustaka, 2015), 1658, 771, entri "moral."

kehidupan seharian. Perkara ini tergambar dalam sabda Rasulullah *Sallallahu 'Alaihi Wasallam*:

إِنَّمَا بُعِثْتُ لِأَتَمِّمَ مَكَارِمَ الْأَخْلَاقِ

Maksudnya: Sesungguhnya aku diutus untuk menyempurnakan kemuliaan akhlak (Riwayat Al-Baihaqi)⁷.

Berdasarkan hadis ini, umat Islam harus menjadikan akhlak Rasulullah *Sallallahu 'Alaihi Wasallam* sebagai pedoman hidup. Kemuliaan akhlak Rasulullah *Sallallahu 'Alaihi Wasallam* ini banyak disebutkan dalam al-Qur'an dan hadis. Sekiranya akhlak atau perbuatan seseorang manusia itu tidak berpandukan kepada ajaran dalam al-Qur'an dan hadis ini maka ianya dianggap sebagai tidak berakhlak.

Di samping itu, akhlak merupakan salah satu indikator kepada pembentukan sesebuah masyarakat. Masyarakat di mana-mana sahaja di dunia ini dan pada bila-bila masa juga sentiasa menerima dan menyanjungi tinggi akhlak yang baik dan menolak serta membenci akhlak buruk dan keji.⁸ Segala pembentukan masyarakat tersebut berkaitan dengan amal ibadah yang dikerjakan oleh manusia. Salah satu amal ibadah yang boleh menjaga akhlak seseorang ialah solat. Allah *Subhanahu Wa Ta'ala* memberi jaminan dalam al-Qur'an bahawa dengan solat boleh mencegah seseorang melakukan perbuatan maksiat sepertimana firman Allah Ta'ala dalam Surah al-Ankabut ayat 45:

إِنَّ الصَّلَاةَ تَنْهَى عَنِ الْفَحْشَاءِ وَالْمُنْكَرِ

⁷ Hadis Riwayat Al-Bayhaqi (no. 20782). Abu Bakar Al-Baihaqi, *al-Sunan al-Kubrâ'*, Juz X, (Beirut: Darul Kutub Al-Ilmiah, t.t), 323.

⁸ Nurul Hudani Md Nawi dan Baharudin Othman (2018), *Konsep Moral Dalam Perspektif Islam dan Barat*, Al-Hikmah, bil.10, no.2, hal. 5.

Maksudnya: Sesungguhnya solat itu mencegah dari (perbuatan) keji dan mungkar.

Ayat ini mengandungi janji Allah yang merupakan jaminan bahawa perkara keji dan mungkar akan tertolak apabila seseorang itu tetap tekun dan bersungguh-sungguh menunaikan kewajipan solat. Ianya akan menjadi benteng daripada pengaruh hawa nafsu yang sentiasa menginginkan perkara-perkara keji dan mungkar. Perkara-perkara keji dan mungkar yang berlaku pada masa ini juga lebih dikenali sebagai gejala sosial atau perbuatan menyalahi moral yang dilihat semakin membimbangkan di kalangan masyarakat.⁹

KEDUDUKAN KESALAHAN MORAL DALAM PERINTAH KANUN HUKUMAN JENAYAH SYARIAH, 2013

Umumnya terdapat beberapa bahagian yang diperuntukkan dalam PKHJS, 2013. Bahagian I adalah mengenai pemakaian dan pentafsiran istilah-istilah, Bahagian II Kecualian Am: mengecualikan Hakim syarie daripada sebarang liabiliti, perbuatan tidak sengaja, kanak-kanak yang belum mumayyiz dan sebagainya. Bahagian III mengenai subahat dan implikasinya dari segi hukuman. Bahagian IV merangkumi kesalahan-kesalahan sebenar yang dibahagikan kepada beberapa penggal. Penggal 1 mengenai kesalahan hudud iaitu *sariqah*, *hirabah*, zina, zina *bil-jabar*, liwat, *qazaf*, meminum minuman yang memabukkan dan *irtidad*. Penggal II pula mengenai *Qatl* dan kecederaan, manakala penggal III adalah mengenai penarikan balik syahadah. Seterusnya penggal IV mengenai

⁹ Pelita brunei online, Sembahyang Mencegah Kemungkaran, 25/04/2018,

<https://www.pelitabrunei.gov.bn/Lists/Agama/NewDisplayForm.aspx?ID=513&ContentTypeId=0x0100F6D57A3EFF61B0428F673FEADAB5CF1E>, Dicapai pada 6 April 2023.

kesalahan-kesalahan am. Bahagian V pula mengenai perkara-perkara am.

Di bawah PKHJS 2013, tiada istilah atau bahagian khusus mengenai kesalahan moral diperuntukkan dan digunakan. Justeru, bagi maksud artikel ini, kesalahan berkaitan moral dikenalpasti menerusi beberapa kriteria, iaitu:

- i. Perlakuan berkaitan seksual
- ii. Perlakuan membabitkan pasangan lelaki dan perempuan yang bukan mahram
- iii. Perlakuan tidak senonoh
- iv. Perlakuan berkaitan pelanggaran kesopanan di tempat awam.

Walaupun peruntukan kesalahan yang terkandung di dalam PKHJS, 2013 pada asasnya adalah melebihi 130 kesalahan yang merangkumi *hudud*, *qisās* dan takzir¹⁰, namun realiti penglibatan pesalah wanita di Mahkamah Syariah setakat ini terutama dalam kesalahan moral hanya melibatkan dalam tujuh atau lapan kesalahan sahaja¹¹.

Berikut adalah senarai kesalahan yang diperuntukkan dalam PKHJS, 2013 serta kriteria yang dikenalpasti berkaitan kesalahan moral iaitu:

1. Kriteria Berkaitan Perlakuan Berkaitan Seksual dan Perlakuan Membabitkan Pasangan Lelaki dan Perempuan yang Bukan Mahram:

- i. (Bab 68) Zina – Ianya bermaksud persetubuhan dengan sengaja di antara lelaki dan perempuan tanpa

¹⁰ Perintah Kanun Hukuman Jenayah Syariah, 2013.

¹¹ Sumber daripada pegawai penyelidikan, Bahagian Penyelidikan, Mahkamah Rayuan Syariah Negara Brunei Darussalam dan pegawai daripada Bahagian Pendakwaan Syar'ie, Unit Perundangan Islam.

- pernikahan yang sah atau persetujuan itu bukan persetujuan *syubhah* (diragui).
- ii. (Bab 75) Zina *bil-jabar* – Ianya bermaksud persetujuan di antara lelaki dan perempuan yang tidak bernikah secara sah dalam mana-mana keadaan berikut:
- a. bertentangan dengan kemahuan mangsa;
 - b. tanpa kerelaan mangsa;
 - c. dengan kerelaan mangsa, apabila kerelaan diperolehi dengan ugutan bahawa mangsa itu akan dibunuh atau dcederakan;
 - d. dengan kerelaan mangsa, apabila pesalah mengetahui bahawa pesalah tidak bernikah secara sah dengan mangsa dan kerelaan itu diberikan kerana mangsa percaya yang pesalah itu adalah orang lain yang kepadanya mangsa telah bernikah secara sah atau mangsa tersebut percaya dia bernikah secara sah dengan pesalah itu;
 - e. dengan kerelaan mangsa, jika kerelaan itu diberi oleh mangsa dalam keadaan salah faham tentang fakta dan pesalah itu mengetahui, atau mempunyai sebab untuk mempercayai, bahawa kerelaan itu telah diberi oleh sebab salah faham itu;
 - f. dengan kerelaan mangsa, jika kerelaan itu diberi oleh mangsa yang tidak sempurna akal atau oleh sebab mabuk, tidak boleh memahami keadaan dan akibat dari apa yang direlakan olehnya, atau jika kerelaan itu diberi oleh seseorang yang belum baligh.
- iii. (Bab 82) Liwat – Ianya bermaksud persetujuan di antara seorang lelaki dengan seorang lelaki yang lain atau di antara seorang lelaki dengan seorang perempuan selain isterinya, yang dilakukan di luar tabii iaitu melalui dubur.

- iv. (Bab 94) Hamil luar nikah – Ianya bermaksud perempuan Islam yang didapati hamil atau melahirkan anak luar nikah.

2. Kriteria Berkaitan Perlakuan Berkaitan Seksual:

- i. (Bab 90) *Ityan al-mayyitah* – Ianya bermaksud suatu kesalahan kerana melakukan persetubuhan dengan orang yang sudah meninggal dunia, sama ada orang yang sudah meninggal dunia itu lelaki atau Perempuan.
- ii. (Bab 91) *Ityan al-bahimah* – ianya bermaksud suatu kesalahan kerana melakukan persetubuhan dengan binatang.
- iii. (Bab 92) *Musahaqah* – Ianya bermaksud kegiatan fizikal antara perempuan dengan perempuan yang akan terjumlah kepada perbuatan seksual jika ia dilakukan antara seorang lelaki dan seorang perempuan, selain kemasukan.

3. Kriteria Perlakuan Tidak Senonoh dan Perlakuan Berkaitan Pelanggaran Kesopanan di Tempat Awam Atau di Tempat Tersembunyi:

- i. (Bab 196) *Khalwat* – Ianya bermaksud:
 - a. Bersekediaman, bersekedudukan, berkurung; atau
 - b. Mengasingkan diri dalam keadaan berhampiran yang mendatangkan syak bahawa mereka sedang melakukan perbuatan maksiat, di antara seorang lelaki dan seorang perempuan atau lebih yang bukan isterinya atau mahramnya, atau di antara seorang perempuan dan seorang lelaki atau lebih yang bukan suaminya atau mahramnya.

- ii. (Bab 197) Perbuatan tidak sopan – Ianya bermaksud suatu perbuatan yang boleh menjejaskan imej ugama Islam, merosakkan akhlak, mendatangkan pengaruh buruk atau kemarahan kepada orang yang mungkin menyaksikan perbuatan tersebut.
- iii. (Bab 198) Berlagak menyerupai perempuan atau sebaliknya – Ianya bermaksud mana-mana perempuan yang memakai pakaian lelaki dan berlagak menyerupai lelaki di mana-mana tempat awam tanpa alasan yang munasabah dan untuk tujuan yang tidak bermoral.

Berdasarkan senarai di atas, didapati terdapat 10 kesalahan yang boleh dikategorikan sebagai kesalahan terhadap moral di bawah PKHJS, 2013. Ia merangkumi kesalahan am yang boleh dikenakan hukuman takzir dan juga yang boleh dikenakan hukuman hudud. Walau bagaimanapun, didapati hanya 3 daripada 10 kesalahan tersebut pernah dibicarakan di Mahkamah Syariah Brunei iaitu kesalahan hamil luar nikah, khalwat dan perbuatan tidak sopan. Kesalahan khalwat yang dilakukan oleh orang beragama Islam merupakan kesalahan yang tertinggi dalam statistik di Mahkamah Syariah Brunei seperti yang tertera dalam statistik berikut.

Jadual 1: Statistik Kesalahan Membabitkan Pesalah Wanita 2014 – 2020

Tahun	2014	2015	2016	2017	2018	2019	2020	Jumlah Keseluruhan
Peruntukan Bab								
94(1) (a) - Perempuan Islam Hamil / Melahirkan Anak Luar Nikah (<i>Muhshan</i>)	0	0	1	1	2	0	2	
94(1) (b) - Perempuan Islam Hamil / Melahirkan Anak Luar Nikah (<i>Ghairu Muhshan</i>)	0	0	0	0	0	7	27	
196(1) – Khalwat yang dilakukan oleh orang Islam	8	16	27	46	49	37	56	
196(2) – Khalwat yang dilakukan oleh orang bukan Islam dengan orang Islam	0	0	2	1	7	6	3	
197(1) – Perbuatan Tidak Sopan Dilakukan di Mana-Mana Tempat Awam	0	0	0	1	2	0	0	
Jumlah Kes Pesalah Wanita	5	16	30	49	60	50	88	
Jumlah Keseluruhan Kes yang didaftarkan	24	100	157	100	118	105	196	800

Sumber: Bahagian Penyelidikan Mahkamah-Mahkamah Syariah Negara Brunei Darussalam.

Hasil daripada penelitian terhadap jadual di atas, didapati bahawa kes yang melibatkan kesalahan wanita ini telah menunjukkan peningkatan pada tahun 2020 seperti yang terkandung dalam jadual yang dibekalkan di atas. Kebanyakan kes pesalah wanita yang dibicarakan di Mahkamah Syariah ini menjurus kepada kesalahan moral sepertimana kriteria yang dijelaskan di atas tadi.

Manakala dari segi hukuman pula, peruntukan hukuman kesalahan moral ini adalah denda atau penjara. Sungguhpun begitu, majoriti kes melalui contoh-contoh penghakiman yang terdapat dalam laporan mahkamah berakhir dengan penentuan hukuman denda sahaja terhadap pesalah walaupun terdapat peruntukan hukuman penjara sebagai pilihan lain bagi kes tersebut. Hal ini dipercayai bahawa, penentuan hukuman denda tersebut telah menjadi amalan mahkamah syariah sejak dulu lagi berikutan ada unsur pilihan hukuman yang diperuntukkan dalam undang-undang.¹² Menurut Jasri Jamal dan Hasnizam Hashim, penggunaan perkataan ‘atau’ di antara hukuman penjara dan hukuman denda boleh membuka ruang bagi mahkamah syariah untuk lebih memilih hukuman denda berbanding dengan hukuman penjara.¹³ Dalam hal ini juga, peruntukan 251(2) dalam PKHJS, 2013 ada menyatakan bahawa hukuman penjara boleh dijatuhkan jika denda yang dikenakan tidak dibayar dengan syarat hukuman penjara itu tidak boleh melebihi separuh daripada hukuman penjara yang diperuntukkan bagi kesalahan itu.¹⁴ Oleh itu,

¹² Pengiran Dr Haji Badaruddin bin Pengiran Haji Abdul Rahman (Hakim Mahkamah Rendah Syariah Negara Brunei Darussalam), dalam temu bual dengan penulis, 29 Mei 2021.

¹³ Jasri dan Hasnizam, Transformasi Mahkamah Syariah di Malaysia: Keperluan Kajian Semula Terhadap Bentuk Hukuman bagi Kes-Kes Jenayah Syariah, *Ulum Islamiyyah Journal*, vol. 12, hal. 88.

¹⁴ Perintah Kanun Hukuman Jenayah Syariah, 2013 (Bil. S 69, 2013), 1648.

kebanyakan kes yang dihukumkan penjara di bawah Mahkamah Syariah Negara Brunei Darussalam adalah disebabkan pesalah tidak membayar denda dan bukan pada asal hukuman yang ditentukan oleh hakim.¹⁵

Bagi kesalahan yang pernah dibicarakan di Mahkamah Syariah Brunei iaitu kesalahan khalwat, hamil luar nikah, dan perbuatan tidak sopan, hukuman yang dikenakan ke atas pesalah wanita pada kebiasaannya adalah hukuman denda. Berikut ialah hukuman yang diperuntukkan dalam tiga kesalahan tersebut.

Hukuman bagi kesalahan khalwat sebagaimana yang diperuntukkan dalam PKHJS, 2013 ialah:

“196 (1) Mana-mana orang Islam yang melakukan khalwat adalah melakukan kesalahan dan hendaklah jika sabit kesalahan dikenakan suatu denda tidak melebihi \$4,000, dihukum penjara selama suatu tempoh tidak melebihi satu tahun atau kedua-duanya sekali.

(2) Mana-mana orang bukan Islam yang melakukan khalwat dengan orang Islam adalah melakukan satu kesalahan dan hendaklah jika sabit kesalahan dikenakan suatu denda tidak melebihi \$4,000, dihukum penjara selama suatu tempoh tidak melebihi satu tahun atau kedua-duanya sekali.”

Manakala hukuman bagi kesalahan hamil luar nikah yang diperuntukkan dalam PKHJS, 2013 pula ialah:

¹⁵ Pengiran Dr Haji Badaruddin bin Pengiran Haji Abdul Rahman (Hakim Mahkamah Rendah Syariah Negara Brunei Darussalam), dalam temu bual dengan penulis, 29 Mei 2021.

“94 (1) Mana-mana perempuan Islam yang didapati hamil atau melahirkan anak luar nikah adalah melakukan suatu kesalahan dan hendaklah jika sabit kesalahan –

(a) jika dia muhshan¹⁶, dikenakan suatu denda tidak melebihi \$8,000, dihukum penjara selama suatu tempoh tidak melebihi 2 tahun atau kedua-duanya sekali;

(b) jika ghairu muhshan¹⁷, dikenakan suatu denda tidak melebihi \$4,000, dihukum penjara selama suatu tempoh tidak melebihi satu tahun atau kedua-duanya sekali”.

Seterusnya ialah hukuman bagi kesalahan perbuatan tidak sopan yang diperuntukkan dalam PKHJS, 2013:

“197 (1) Mana-mana orang yang melakukan perbuatan tidak sopan di mana-mana tempat awam adalah melakukan suatu kesalahan dan hendaklah jika sabit kesalahan dikenakan suatu denda tidak melebihi \$2,000, dihukum penjara selama suatu tempoh tidak melebihi 6 bulan atau kedua-duanya sekali”.

Peruntukan-peruntukan mengenai kesalahan moral ini adalah lebih luas skopnya dan kadar hukuman yang dikenakan lebih tinggi berbanding dengan peruntukan kesalahan dalam akta sebelum PKHJS, 2013 dikuatkuasakan.

¹⁶ Tafsiran *muhshan* dalam PKHJS, 2013 ialah: seseorang yang sudah berkahwin dengan sah dan telah melakukan persetubuhan dalam perkahwinan itu.

¹⁷ Tafsiran *ghairu muhshan* dalam PKHJS, 2013 ialah: seseorang yang belum berkahwin atau sudah berkahwin tetapi belum pernah melakukan persetubuhan dalam perkahwinan itu.

KES KESALAHAN MORAL YANG MELIBATKAN WANITA DI MAHKAMAH SYARIAH BRUNEI DARUSSALAM

Bagi kesalahan moral yang melibatkan wanita dan yang pernah dibicarakan di bawah peruntukan PKHJS, 2013, penulis telah mendapati beberapa laporan kes penghakiman yang berkaitan dengan kesalahan tersebut. Laporan kes penghakiman ini telah diperolehi melalui fail Mahkamah Syariah dan juga daripada Bahagian Pendakwaan Syar'ie. Kes-kes yang disenaraikan di bawah ini adalah antara kes-kes yang berkaitan dengan kesalahan moral pada tahun 2017 hingga tahun 2022. Di antara kes tersebut adalah seperti berikut:

1. Kesalahan Hamil Luar Nikah (*Muhsan*):

- i. Kes **Bil. BM/MRS/JEN-G/J049A/0035/02-2022** antara Pendakwa Syar'ie *lwn* Pg Azim dan Taibah di mana Yang DiTuduh (Taibah) telah melakukan kesalahan hamil luar nikah (*Muhsan*) dari bab 94(1)(a) Perintah Kanun Hukuman Jenayah Syariah, 2013¹⁸ dan telah dihukum denda sebanyak \$5,000.¹⁹ YDT (Pg Azim) juga dihukum dengan hukuman sama atas kesalahan menghamili perempuan iaitu denda sebanyak \$5,000. Dalam kes ini, kedua-dua YDT telah mengaku salah di atas kesalahan mereka.
- ii. Melalui kes **Bil. KB/MRS/JEN-G/J049A/087/12-2020** di antara Pendakwa Syar'ie *lwn* Eirda binti Saimi yang berkaitan dengan kesalahan hamil luar nikah

¹⁸ Bab 94(1)(a) memperuntukkan: Mana-mana perempuan Islam yang didapati hamil atau melahirkan anak luar nikah adalah melakukan suatu jenayah dan hendaklah sabit jenayah -Jika dia *muhsan*, dikenakan suatu denda tidak melebihi \$8,000, dihukum penjara selama suatu tempoh tidak melebihi dua tahun atau kedua-duanya sekali.

¹⁹ Sumber laporan daripada Pegawai Mahkamah Syariah Brunei Darussalam yang diterima pada 28 Jun 2022.

(*Muhsan*) juga, YDT telah didakwa bawah bab 94(1)(a) dari Perintah Kanun Hukuman Jenayah Syariah 2013. Dalam kes ini, YDT (Eirda) yang sudah bersuami telah hamil hasil perbuatannya dengan pasangan yang bukan suaminya. Dalam hal ini, YDT (Eirda) telah mengaku bersalah atas kesalahannya. Oleh itu, Hakim Syar'ie bagi kes ini telah menjatuhkan hukuman denda sebanyak \$4,500 atau penjara 100 hari jika pesalah gagal membayar denda. Hukuman tersebut berkuatkuasa bermula 19 Januari 2021.²⁰

2. Kesalahan Hamil Luar Nikah (*Ghairu Muhsan*):

Kes **Bil. BM/MRS/JEN-G/J050A/013/01-2020** antara Ketua Pendakwa Syar'ie *lwn* Yang Tertuduh (YDT) di mana YDT telah melakukan kesalahan hamil luar nikah (*ghairu muhsan*) di bawah bab 94(1)(b) dari Perintah Kanun Hukuman Jenayah Syariah, 2013.²¹ Dalam hal ini, YDT telah mengaku bersalah atas jenayahnya. Oleh itu, mahkamah menjatuhkan hukuman denda sebanyak \$2,000 atau penjara selama enam bulan jika gagal membayar denda.

3. Kesalahan Perempuan Islam Melakukan Khalwat:

Kes **Bil. KB/MRS/JEN-G/J141A/014/03-2018** antara Ketua Pendakwa Syar'ie *lwn* Yang Tertuduh (YDT)²² di mana YDT telah dituduh melakukan kesalahan khalwat di

²⁰ Sumber kes daripada catatan Laporan Penghakiman yang belum bercetak daripada Penolong Pendaftar Mahkamah Rendah Syariah Brunei yang diperolehi pada 26 Jun 2022.

²¹ Bab 94(1)(a) memperuntukkan: Mana-mana perempuan Islam yang didapati hamil atau melahirkan anak luar nikah adalah melakukan suatu jenayah dan hendaklah sabit jenayah -Jika dia *ghairu muhsan*, dikenakan suatu denda tidak melebihi \$4,000, dihukum penjara selama suatu tempoh tidak melebihi satu tahun atau kedua-duanya sekali.

²² Sumber laporan daripada Bahagian Pendakwa Syar'ie, Brunei Darussalam yang diperolehi pada 8 Ogos 2020.

bawah bab 196(1) Perintah Kanun Hukuman Jenayah Syariah, 2013.²³ Menerusi kes ini, YDT telah mengakui kesalahannya dan dijatuhkan hukuman denda \$3,000 atau penjara selama 180 hari jika gagal membayar denda.²⁴

4. Kesalahan Perempuan Bukan Islam Melakukan Khalwat Bersama Lelaki Islam:

Kes Bil. TT/MRS/JEN-G/J141A/043/11-2019 antara Pendakwa Syar'ie *Lwn* Yang Tertuduh (YDT).²⁵ YDT telah melakukan kesalahan khalwat bersama lelaki Islam di bawah bab 196(2) Perintah Kanun Hukuman Jenayah Syariah, 2013. Dalam hal ini, YDT telah mengaku salah dan mahkamah menjatuhkan hukuman denda \$2,000 atau penjara selama enam bulan jika gagal membayar denda.²⁶

5. Kesalahan Perbuatan Tidak Sopan: Kes Bil. BM/MRS/JEN-G/J141A/074/07-2017 antara Pendakwa Syar'ie *lwn* Yang Tertuduh (YDT). Dalam kes ini didapati bahawa YDT telah melakukan kesalahan perbuatan tidak sopan di bawah bab 197(1) Perintah Kanun Hukuman Jenayah Syariah, 2013.²⁷ Pengakuan salah YDT telah

²³ Bab 196(1) memperuntukkan: Mana-mana orang Islam yang melakukan *khalwat* adalah melakukan jenayah dan hendaklah jika sabit jenayah dikenakan suatu denda tidak melebihi \$4,000, dihukum penjara selama suatu tempoh tidak melebihi satu tahun atau kedua-duanya sekali.

²⁴ Sumber laporan daripada Bahagian Pendakwa Syar'ie, Brunei Darussalam yang diperolehi pada 8 Ogos 2020.

²⁵ Sumber laporan daripada Bahagian Pendakwa Syar'ie, Brunei Darussalam yang diperolehi pada 8 Ogos 2020.

²⁶ Sumber daripada Bahagian Pendakwa Syar'ie, Brunei Darussalam yang diperolehi pada 8 Ogos 2020.

²⁷ Bab 197(1) memperuntukkan: Mana-mana orang yang melakukan perbuatan tidak sopan di mana-mana tempat awam adalah melakukan jenayah dan hendaklah jika sabit jenayah dikenakan suatu denda tidak melebihi \$8,000, dihukum penjara selama suatu tempoh tidak melebihi dua tahun atau kedua-duanya sekali.

mensabitkananya hukuman denda sebanyak \$1,500 atau penjara selama 90 hari jika gagal membayar denda.²⁸

Melalui kes di atas, didapati bahawa semua kes berakhir dengan penentuan hukuman denda sahaja terhadap pesalah wanita walaupun terdapat peruntukan hukuman penjara sebagai pilihan lain bagi kes tersebut. Hal ini dipercayai bahawa, penentuan hukuman denda tersebut telah menjadi amalan mahkamah syariah sejak dulu lagi berikutan ada unsur pilihan hukuman yang diperuntukkan dalam undang-undang.

Walau bagaimanapun, dalam beberapa kes seperti yang dibicarakan di bawah Akta Majlis Ugama Islam dan Mahkamah-Mahkamah Kadi Penggal 77²⁹, terdapat pesalah wanita yang dihukum penjara di atas kesalahan persetubuhan haram. Kesalahan ini diperuntukkan dalam bab 178(3) di mana hukuman asalnya adalah penjara sahaja tanpa denda.³⁰ Berbeza dengan PKHJS, 2013, setakat kajian ini dilakukan belum ada pesalah wanita yang dipenjarakan berkaitan kesalahan jenayah syariah yang dilakukan.³¹

²⁸ Sumber daripada Bahagian Pendakwa Syariah, Brunei Darussalam yang diperoleh pada 8 Ogos 2020.

²⁹ Akta ini digunapakai sebelum pelaksanaan PKHJS, 2013 di Brunei yang memperuntukkan dua kesalahan moral iaitu khalwat dan persetubuhan haram.

³⁰ Bab 178(3) memperuntukkan: Mana-mana orang yang melakukan persetubuhan dengan mana-mana orang yang dia, dan siapa yang diketahuinya atau mempunyai alasan untuk dipercayai bahawa dia, ditegah oleh hukum syarak untuk kahwin, adalah melakukan suatu kesalahan: Hukuman, dalam hal -

(a) seorang lelaki, dipenjara selama 5 tahun; dan

(b) seorang perempuan, dipenjara selama satu tahun.

³¹ Sumber maklumat daripada Bahagian Pendakwaan Syariah, Unit Perundangan Islam, Negara Brunei Darussalam.

FAKTOR PENINGKATAN PENGLIBATAN WANITA DALAM KESALAHAN MORAL DI BRUNEI DARUSSALAM

Penglibatan wanita dalam kesalahan moral dilihat semakin membimbangkan di mana ianya sudah dianggap perkara biasa bagi sesetengah masyarakat di Brunei Darussalam. Kesalahan moral ini merupakan antara kesalahan jenayah syariah takzir di mana hukumannya merupakan denda ataupun penjara. Daripada statistik yang dibekalkan oleh Mahkamah Syariah Brunei, kes khalwat telah mendominasi kes-kes kesalahan jenayah Syariah yang lain. Sebanyak 258 kes kesalahan khalwat telah didaftarkan sejak 2014 hingga 2020 di mana kes khalwat merupakan kes tertinggi bagi kesalahan jenayah syariah di Mahkamah Syariah Brunei. Ini dapat dibuktikan lagi apabila didapati dalam satu laporan yang dipaparkan oleh akhbar tempatan di Brunei menyatakan lebih separuh daripada kes kesalahan jenayah syariah adalah merupakan kes khalwat.³²

Melalui kajian yang dibuat didapati terdapat beberapa faktor yang boleh menyumbang kepada peningkatan penglibatan wanita dalam kesalahan moral ini, antaranya ialah seperti berikut:

1. Kurang Menerapkan Ajaran Agama

Melalui laporan kes-kes penghakiman yang dikaji, kebanyakan pesalah wanita didapati kurang menerapkan ajaran Islam dan tidak menitikberatkan berkaitan pergaulan yang telah ditetapkan oleh syarak. Ini dapat dilihat apabila tertuduh membuat perkara-perkara yang tidak bermoral

³² Salawati Haji Yahya, "Statistik kes jenayah syariah menurun, laman sesawang Media Permata. Diakses pada 29 September 2023. "<https://mediapermata.com.bn/statistik-kes-jenayah-syariah-menurun/> 1 Februari 2018.

seperti berdua-duaan dengan seseorang yang bukan mahramnya sedangkan perkara asas yang perlu disedari dalam hal pergaulan sebagai seorang muslim ialah tidak berdua-duaan antara lelaki dan perempuan tanpa sebarang ikatan perkahwinan atau mahram.³³

Penghayatan ajaran agama adalah mustahak terutama dalam isu aktiviti seksual sebelum pernikahan. Ini kerana mereka yang kurang penghayatan agama lebih mudah untuk terjebak dalam hubungan seksual.³⁴ Melalui kes-kes yang dikaji, terdapat juga pesalah yang sudah berkahwin terjebak dengan aktiviti seksual bersama teman lelaki mereka. Ini menunjukkan bahawa perasaan malu yang sepatutnya menjadi lambang keimanan seseorang telah hilang dan mencemarkan identiti Islam. Hal ini tidak wajar dibiarkan kerana ia bukan sekadar merosakkan generasi yang terlibat, bahkan turut memberi kesan kepada perkembangan generasi di masa akan datang.

2. Pengaruh Persekitaran

Persekitaran memainkan peranan yang signifikan kepada perkembangan peribadi seseorang. Persekitaran yang baik melahirkan insan yang kamil manakala persekitaran yang kurang baik akan melahirkan insan masyarakat dengan pelbagai masalah. Berdasarkan kajian yang dibuat, didapati persekitaran adalah salah satu punca peningkatan penglibatan wanita dalam kesalahan moral. Ianya merangkumi pengaruh daripada rakan-rakan, media sosial, hubungan keluarga dan sebagainya. Pemilihan rakan-rakan

³³ Nabilah Rosmasayu Metusin dan Mohd Al Adib Samuri (2017), Faktor-Faktor Dorongan Khalwat di Negara Brunei Darussalam, *Journal of Contemporary Islamic Law*, Vol. 2, No 2, hal. 42.

³⁴ Maria Awaluddin, *et. al.*, (2015), Prevalence of Sexual Activity in Older Malaysian Adolescents and Associated Factors, *Journal of Public Health Aspects*, vol. 1, no.2, hal. 5.

yang salah menyebabkan seseorang mudah terpengaruh dengan sikap dan tingkah laku mereka. Hubungan yang melebihi batas pergaulan menyebabkan seseorang terjebak dengan kesalahan moral ini.³⁵ Di samping itu, media juga amat berkuasa dalam mengubah atau membentuk sikap seseorang. Penggunaan teknologi yang tiada batasan dan sekatan menyebabkan seseorang mudah terpengaruh sehingga melibatkan diri dalam kesalahan moral.

Suasana keluarga yang tidak harmoni juga boleh mendorong seseorang untuk mencari kebahagiaan dan keseronokan di luar rumah. Perkara ini sedikit sebanyak mendorong mereka untuk melakukan hubungan terlarang kerana dengan pergaulan bebas ditambah lagi dengan kesunyian akan membuatkan mereka keluar mencari hiburan dengan teman yang dapat memenuhi keinginan mereka.³⁶

3. Peruntukan Hukuman yang Kurang Berkesan

Peruntukan dan hukuman dalam kesalahan moral dirasakan kurang efektif terhadap pesalah. Ini dapat dilihat dalam kes **Bil. BM/89/2002** antara Pendakwa Syar'ie *lwn* Hj Abu Bakar Hj Apong dan Hjh Jarinah binti Hj Ahmad di mana didapati Yang Tertuduh (Hjh Jarinah binti Hj Ahmad) pernah melakukan kesalahan yang sama iaitu kesalahan khalwat dan dihukum dengan hukuman denda sama seperti sebelumnya dengan kadar yang berbeza.³⁷ Melalui temu bual

³⁵ Haja Mydin Abdul Kuthoos *et al.*, (2016), Penerokaan Awal Terhadap Jenayah Seksual Dalam Kalangan Remaja Lelaki di Malaysia: Satu Kajian Kes Terhadap Remaja di Sebuah Pusat Pemulihan, *3rd KANITA POSTGRADUATE INTERNATIONAL CONFERENCE*, hal.194 – 195.

³⁶ Mahathir Yahaya *et al.*, (2019), Faktor Dalam Yang Mendorong Perlakuan Seks Luar Nikah Dalam Kalangan Remaja, *Journal of Islamic, Social, Economics and Developmet (JISED)*, Vol. 4, Issue. 23, hal. 91.

³⁷ Laporan Kes-Kes Jenayah (2001, 2002, 2003, 2005, 2006, 2012 dan 2013). Laporan ini disimpan dalam perpustakaan Mahkamah Syariah Brunei dan tidak dicetak untuk orang awam.

bersama Hakim, mereka menyatakan bahawa hakim hanya boleh menghukum pesalah berdasarkan peruntukan undang-undang yang ada. Amalan hukuman yang dikenakan terhadap pesalah di Mahkamah Syariah kebanyakannya didahulukan dengan hukuman denda sejak dulu lagi. Ini membuatkan pesalah maklum bahawa mereka boleh melepaskan diri dari hukuman setelah mampu melunaskan bayarannya.³⁸ Disebabkan itu, peningkatan penglibatan wanita dalam kesalahan moral ini agak sukar dibendung jika hukuman yang diperuntukkan masih lagi statik dengan hukuman yang sama.

PEMUTUSAN HUKUMAN TERHADAP PESALAH WANITA DI MAHKAMAH SYARIAH BRUNEI DARUSSALAM

Setiap jenayah mempunyai hukuman yang telah ditetapkan dalam undang-undang. Pemutusan hukuman terhadap pesalah adalah berdasarkan kepada peruntukan yang ada serta pembuktian atau keterangan yang dihadapkan kepada Hakim Bicara.³⁹ Sepertimana kenyataan daripada Yang Arif Haji Johar⁴⁰ apabila seorang wanita didakwa dan disabitkan bersalah, Hakim yang mendengar kes itu hendaklah menghukum dengan hukuman yang ditetapkan undang-undang.

³⁸ Yang Arif Haji Johar bin Haji Muhamad (Hakim Syar'ie Mahkamah Tinggi Syariah, Negara Brunei Darussalam), dalam temu bual secara bertulis, 7 Julai 2021, Yang Arif Haji Hassan bin Haji Metali (Hakim Syar'ie Mahkamah Tinggi Syariah, Negara Brunei Darussalam), dalam temu bual secara bersemuka, 3 Julai 2021.

³⁹ Yang Arif Haji Hassan bin Haji Metali (Hakim Syar'ie Mahkamah Tinggi Syariah, Negara Brunei Darussalam), dalam temu bual secara bersemuka, 3 Julai 2021.

⁴⁰ Yang Arif Haji Johar bin Haji Muhamad (Hakim Syar'ie Mahkamah Tinggi Syariah, Negara Brunei Darussalam), dalam temu bual secara bertulis, 7 Julai 2021.

Walau bagaimanapun, Hakim juga mengambil kira kebajikan pesalah sebelum memutuskan hukuman bagi tujuan memberikan keadilan terhadap pesalah tersebut melalui faktor penentuan bentuk hukuman tersebut. Di antara faktor yang sering menjadi pertimbangan dalam sesuatu kes adalah seperti berikut:

1. Faktor Peruntukan Undang-Undang

Menerusi peruntukan undang-undang jenayah syariah di Brunei, hukuman terhadap pesalah wanita yang melakukan kesalahan moral memperuntukkan kadar hukuman denda sehingga \$5,000 atau penjara hingga dua tahun (tertakluk kepada jenis kesalahan). Walau bagaimanapun, hukuman penjara jarang dikenakan ke atas pesalah kecuali jika pesalah tidak membayar hukuman denda yang dikenakan terhadapnya.

Pada kebiasaannya, Hakim-Hakim Syar'ie sebelum menjatuhkan hukuman ke atas mana-mana pesalah akan merujuk terlebih dahulu peruntukan undang-undang yang sedia ada. Hampir kebanyakan kes membincangkan berkenaan dengan takat hukuman yang telah diberikan oleh Mahkamah Rendah Syariah.⁴¹ Sebagai contoh, kes Pendakwa Syar'ie *lwn* Taibah⁴² yang didakwa melakukan kesalahan hamil luar nikah dan telah dihukum mengikut peruntukan yang ada. Hakim Syar'ie hanya boleh menghukum pesalah berdasarkan peruntukan undang-undang yang terkandung dalam Perintah. Sebarang hukuman yang tidak mengikut ketetapan undang-undang adalah tidak sah. Oleh itu, penentuan bentuk hukuman terhadap pesalah adalah terbatas mengikut peruntukan yang ada.

⁴¹ Yang Arif Haji Johar bin Haji Muhamad (Hakim Syar'ie Mahkamah Tinggi Syariah, Negara Brunei Darussalam), dalam temu bual secara bertulis, 7 Julai 2021.

⁴² BM/MRS/JEN-G/J049A/0035/02-2022.

2. Faktor Kepentingan Awam

Tujuan utama undang-undang digubal dan dikuatkuasakan adalah untuk menjaga kepentingan awam secara keseluruhan berbanding kepentingan individu.⁴³ Setiap perlakuan jenayah akan dijatuhi hukuman disebabkan kecuaiannya tidak mematuhi undang-undang. Dalam pertimbangan menjatuhkan hukuman, pengakuan bersalah boleh meringankan hukuman pesalah. Walau bagaimanapun, Mahkamah juga mesti menentukan imbalan antara kepentingan awam dengan hal keadaan yang meringankan (*mitigating circumstances*) di mana Mahkamah dikehendaki sentiasa menjaga maruah dan kewibawaan undang-undang.⁴⁴ Sebagai contoh, jika hukuman denda yang dikenakan ke atas pesalah syariah terlalu rendah, ianya boleh membuatkan pesalah tidak serik untuk mengulangi kesalahan yang sama. Dalam kes Pendakwa Syar'ie *lwn* Eirda binti Saimi⁴⁵ dalam kesalahan hamil luar nikah (*muhsan*), Hakim Bicara telah memutuskan untuk mengenakan hukuman denda \$4,500 terhadap pesalah. Tujuan hukuman ini diputuskan adalah bagi mencegah masyarakat daripada melakukannya.

3. Faktor Umur

Umur merupakan salah satu faktor penting dalam menentukan hukuman seseorang. Kebiasaannya, hukuman yang dikenakan ke atas pesalah muda adalah lebih ringan jika dibandingkan dengan mereka yang lebih tua. Dalam kes *sariqah* antara Ketua Pendakwa Syar'ie *lwn* Nurul Shadatul

⁴³ Pengiran Dr Haji Badaruddin Pengiran Haji Abdul Rahman (Hakim Mahkamah Rendah Syariah Negara Brunei Darussalam), dalam temu bual dengan penulis, 29 Mei 2021.

⁴⁴ Laporan Undang-Undang Syariah Brunei (2004-2007), Mahkamah-Mahkamah Syariah Negara Brunei Darussalam, 2010, 294.

⁴⁵ KB/MRS/JEN-G/J049A.087/12-2020.

binti Shahariffin⁴⁶, Hakim Bicara telah menjatuhkan hukuman bon berkelakuan baik terhadap pesalah dalam jangkamasa dua tahun. Hakim Bicara menetapkan hukuman ini adalah disebabkan pesalah masih berumur 17 tahun dan masih bersekolah. Oleh itu, hukuman denda atau penjara tidak dikenakan ke atasnya disebabkan faktor umur pesalah yang masih muda. Menurut YA Haji Hassan, Hakim Syar'ie Mahkamah Syariah Brunei pada kebiasaannya mempertimbangkan pesalah yang masih muda terutama yang masih bersekolah akan dikenakan hukuman bon berkelakuan baik pada kadar tempoh tertentu bagi menjaga kebajikan pesalah tersebut.⁴⁷ Ini adalah untuk menjamin masa depan pesalah tersebut yang masih bersekolah dan ia juga belum ada pendapatan untuk membayar hukuman denda sekiranya dikenakan hukuman tersebut ke atasnya.

Sebagai tambahan, di Mahkamah Syariah, penentuan faktor umur seseorang yang melakukan kesalahan dilihat dari segi kategori lingkungan umurnya iaitu *mumaiyiz*⁴⁸, *baligh*⁴⁹ dan juga *mukallaf*.⁵⁰ Bagi kanak-kanak yang belum *mumaiyiz*, mereka tidak dikenakan apa-apa hukuman jika melakukan kesalahan, manakala bagi pesalah yang belum mencapai umur baligh, Mahkamah tidak mengenakan *hadd* atau *qisās* seperti hukuman mati ke atas pesalah tersebut

⁴⁶ BM/MTS/JEN-G/J014B/073/08-2019.

⁴⁷ YA Haji Hassan Haji Metali (Hakim Syar'ie Mahkamah Tinggi Syariah, Negara Brunei Darussalam), dalam temu bual secara bersemuka, 3 Julai 2021.

⁴⁸ Menurut tafsiran dalam Perintah Keterangan Mahkamah Syariah, 2001 (30/2001), *mumaiyiz* bermakna seorang kanak-kanak yang telah sampai tahap umur yang boleh membezakan di antara sesuatu perkara.

⁴⁹ Menurut tafsiran dalam Perintah Keterangan Mahkamah Syariah, 2001 (30/2001), *baligh* bermakna seorang yang cukup umur mengikut Hukum Syarak.

⁵⁰ Menurut tafsiran dalam PKHJS 2013 *mukallaf* bermaksud seseorang yang telah mencapai umur 15 tahun *qamariah* dan sempurna akalunya.

tetapi hukuman tersebut diganti dengan ditahan sehingga dibenarkan untuk dilepaskan oleh KDYMM Sultan Brunei.

4. Faktor Pendapatan dan Pekerjaan

Secara umumnya, Mahkamah mengambil kira berkenaan pendapatan dan pekerjaan pesalah dalam menentukan hukuman. Bila pesalah itu berpendapatan tinggi, biasanya dikenakan denda yang tinggi. Manakala jika pesalah itu penganggur atau suri rumah tangga sahaja, mereka kerap didenda yang ringan.⁵¹ Dalam kes Ketua Pendakwa Syar'ie *lwn* Nurul Afiqah binti Norariffin⁵² bagi kesalahan *sariqah*, pesalah telah memohon keringanan hukuman disebabkan hanya dia sahaja yang bekerja untuk menanggung anaknya yang baru berusia lapan bulan, manakala suaminya hanya bekerja sebagai mekanik kereta. Mahkamah telah mempertimbangkan permohonannya dengan hukuman denda sebanyak \$3,000 dengan tempoh pembayaran secara ansuran selama enam bulan.

Hal yang sama boleh dilihat dalam kes Rosmali bin Awang Omar *lwn* Pendakwa Syar'ie⁵³ yang dihukum denda sebanyak \$600 atau penjara selama dua minggu jika tidak membayar denda. Perayu memohon untuk membayar denda secara ansuran sebanyak \$100 sebulan, memandangkan dia baru lulus Diploma Bahagian Pelan Engineering dan belum bekerja. Oleh itu, Mahkamah membenarkan untuk membayar secara beransur-ansur selama enam bulan.

⁵¹ Laporan Undang-Undang Syariah Brunei (2004-2007), Mahkamah-Mahkamah Syariah Negara Brunei Darussalam, 2010, 292.

⁵² Kes *sariqah* tidak terjumlah *hudud* Bil. BM/MTS/JEN-G/J014B/72/08-2019. Kes yang belum dicetak.

⁵³ Kes khalwat Bil. MTS/R/JEN/KB/3/02. Laporan Undang-Undang Syariah Brunei (2001-2003), Mahkamah-Mahkamah Syariah Negara Brunei Darussalam, 2010, 92-93.

5. Faktor Tanggungan

Tanggungan pesalah yang disabitkan juga turut menjadi pertimbangan hakim dalam menentukan hukuman. Ini bertujuan hukuman dalam Islam itu memberi pengajaran dan mengelakkan kemudaratannya kepada pihak lain. Walau bagaimanapun, tanggungan bukanlah alasan bagi membebaskan penjenayah daripada hukuman tetapi hanya faktor keringanan sahaja. Ianya akan diambil kira oleh Mahkamah kerana Mahkamah bergantung kepada keterangan-keterangan daripada pendakwa bagi menentukan kewujudan setiap fakta untuk menentukan hukuman.⁵⁴ Dalam kes Pendakwa Syar'ie *lwn* Rokiah binti Gani⁵⁵ pesalah dikenakan hukuman denda sebanyak \$300 atau penjara 12 hari. Dalam hal ini, pesalah merupakan seorang yang tidak ada pendapatan, hanya tinggal di rumah bersama ibu bapanya yang berpencen. Bapanya mendapat \$300 dan ibunya mendapat \$200 daripada Jabatan Kebajikan. Mereka juga tinggal di rumah yang dibina oleh Yayasan Sultan Haji Hassanal Bolkiah. Oleh itu, Hakim Bicara mempertimbangkan keringanan hukuman ke atas pesalah disebabkan faktor tanggungan dan ketidakmampuan pesalah untuk membayar hukuman denda yang lebih tinggi.⁵⁶

6. Faktor Keadaan Mental

Antara faktor yang dianggap boleh mempengaruhi putusan hukuman mahkamah ialah keadaan mental pesalah. Segelintir individu yang melakukan jenayah dikaitkan

⁵⁴ Laporan Undang-Undang Syariah Brunei (2004-2007), Mahkamah-Mahkamah Syariah Negara Brunei Darussalam, 2010, 293.

⁵⁵ Kes Rayuan Jenayah Persetubuhan Haram Bil. MTS/RJ/TUT 02/2006. Lihat Laporan Undang-Undang Syariah Brunei (2004-2007), Mahkamah-Mahkamah Syariah Negara Brunei Darussalam, 2010, 293.

⁵⁶ Laporan Undang-Undang Syariah Brunei (2004-2007), Mahkamah-Mahkamah Syariah Negara Brunei Darussalam, 2010, 293.

dengan tekanan mental disebabkan masalah dalam kehidupannya. Ketidaktepatan akal seseorang boleh menyumbang kepada sesuatu hukuman tersebut ditentukan. Hukuman itu hendaklah sesuatu yang dianggap sesuai untuk pesalah yang menghadapi keadaan mental berkenaan dengan mengambilkira latar belakang pesalah itu. Mahkamah Syariah tidak menghukum bagi mana-mana pesalah yang tidak sempurna akalnya.

Menerusi faktor ini juga, jika Mahkamah merasakan pesalah tersebut tidak sesuai untuk dikenakan hukuman maka Mahkamah boleh memerintahkan agar menolak pertuduhan terhadap pesalah atau melepaskan pesalah tersebut dengan dikenakan bon berkelakuan baik sama dengan penjamin atau tidak.⁵⁷

Berkaitan dengan hukumannya pula, kebanyakan Hakim Bicara lebih cenderung mengenakan hukuman denda ke atas pesalah wanita. Ia seolah-olah menjadi amalan di kalangan Hakim Syarie sejak dulu dalam memilih dan mengenakan hukuman denda terhadap mana-mana pesalah jenayah syariah.⁵⁸ Hasil kajian mendapati bahawa hampir kesemua bentuk hukuman bagi kesalahan moral yang melibatkan wanita di bawah PKHJS, 2013 masih kekal denda. Ini dibuktikan melalui laporan-laporan kes penghakiman di Mahkamah Syariah Brunei yang

⁵⁷ Norjihan Ab Aziz dan Zuraini Ab Hamid, "Restorative Justice under the United Nations Resolution: Rights of the Accused and the Victims of Crimes," *Kanun: Jurnal Undang-undang Malaysia* 30.1 (2018), 100-123, Jan. Diakses pada 15 September 2022. <http://jurnal.dbp.my/index.php/Kanun/article/view/1060>.

⁵⁸ Jasri bin Jamal dan Hasnizam bin Hashim, "Transformasi Mahkamah Syariah di Malaysia: Keperluan Kajian Semula Terhadap Bentuk Hukuman bagi Kes-Kes Jenayah Syariah," *Ulum Islamiyyah Journal* 12 (2014), 88.

menunjukkan bahawa denda dikenakan dalam hampir semua kes kesalahan moral yang melibatkan wanita.

Melalui temu bual bersama Hakim-Hakim Syar'ie, pemutusan hukuman denda terhadap pesalah wanita adalah disebabkan kesalahan moral seperti khalwat dianggap masih dalam kategori kesalahan ringan. Oleh itu, Hakim lebih cenderung mengenakan hukuman denda bagi kesalahan yang dianggap ringan ini. Namun begitu, bagi kesalahan yang berulang atau kesalahan berat seperti yang melibatkan kecederaan ianya boleh dihukum dengan hukuman takzir lain seperti penjara berdasarkan fakta kes.⁵⁹

CADANGAN HUKUMAN ALTERNATIF BAGI KESALAHAN MORAL

Hukuman alternatif merupakan hukuman ganti atau hukuman tambah selain daripada yang ada di bawah peruntukan undang-undang. Keperluan kepada hukuman alternatif yang mengandungi unsur-unsur pemulihan dilihat sebagai satu langkah penting bagi membanteras gejala keruntuhan akhlak dari terus berkembang. Di antara hukuman alternatif yang mengandungi unsur-unsur pemulihan tersebut adalah seperti kerja khidmat masyarakat, kelas ugama bagi memantapkan akidah dan akhlak, pusat pemulihan, kaunseling dan sebagainya. Kebanyakan hukuman alternatif ini bersesuaian dengan pesalah wanita di mana sifatnya lebih mudah menerima dan dibentuk. Namun, hukuman alternatif ini tidak boleh dilaksanakan sewenang-wenangnya. Beberapa faktor perlu diambil kira sebelum

⁵⁹ Temu bual bersama Yang Arif Haji Hassan bin Haji Metali (Hakim Mahkamah Tinggi Syariah Negara Brunei Darussalam), 6hb Jun 2020, Yang Arif Haji Johar bin Haji Muhamad (Hakim Syar'ie Mahkamah Tinggi Syariah, Negara Brunei Darussalam), 7 Julai 2021 dan Pengiran Dr Haji Badaruddin Pengiran Haji Abdul Rahman (Hakim Mahkamah Rendah Syariah Negara Brunei Darussalam), 29 Mei 2021.

pengenaan hukuman alternatif tersebut ke atas pesalah seperti umur dan perwatakan mangsa, tahap kesihatan mental, keseriusan kesalahan yang dilakukan dan lain-lain lagi. Oleh kerana hukuman alternatif adalah tertakluk di bawah hukuman takzir, maka bentuk-bentuk hukuman adalah tertakluk kepada pertimbangan dan budi bicara Mahkamah mengikut kesesuaian jenis kesalahan.⁶⁰

Walau bagaimanapun, berdasarkan peruntukan yang terkandung di dalam PKHJS, 2013, tiada peruntukan hukuman alternatif seperti khidmat masyarakat mahupun pusat pemulihan diperuntukkan dalam undang-undang di Mahkamah Syariah Brunei Darussalam kecuali hukuman denda dan penjara sahaja bagi kesalahan takzir. Contohnya bagi hukuman khalwat di bawah PKHJS 2013, Bab 196 (1) & (2) bagi orang Islam dan orang bukan Islam, terma hukuman adalah seperti berikut,

“.....jika sabit kesalahan dikenakan suatu denda tidak melebihi \$4,000, dihukum penjara selama suatu tempoh tidak melebihi satu tahun atau kedua-duanya sekali.”

Memandangkan hukuman denda menjadi pilihan utama Hakim Syari'ie dalam menjatuhkan hukuman ke atas pesalah, penjara merupakan hukuman alternatif jika seseorang pesalah dikenakan hukuman denda dan gagal atau enggan melunaskannya, maka mahkamah boleh mengarahkan agar pesalah tersebut dipenjarakan. Bab 195(b), Perintah Kanun Peraturan Jenayah Mahkamah

⁶⁰ Temu bual bersama Yang Arif Haji Hassan bin Haji Metali (Hakim Mahkamah Tinggi Syariah Negara Brunei Darussalam), 6hb Jun 2020, Yang Arif Haji Johar bin Haji Muhamad (Hakim Syari'ie Mahkamah Tinggi Syariah, Negara Brunei Darussalam), 7 Julai 2021 dan Pengiran Dr Haji Badaruddin Pengiran Haji Abdul Rahman (Hakim Mahkamah Rendah Syariah Negara Brunei Darussalam), 29 Mei 2021.

Syariah, 2018, menjelaskan tempoh penjara yang boleh dikenakan. Bab tersebut memperuntukkan:

(b) tempoh Mahkamah Syariah mengarahkan pesalah itu dipenjarakan kerana ingkar membayar denda tidak boleh melebihi skala yang berikut:

(i) Jika kesalahan itu boleh dihukum penjara -

<i>jika tempoh maksimum hukuman penjara</i>	<i>tempoh tidak boleh melebihi</i>
---	------------------------------------

<i>tidak melebihi enam bulan</i>	<i>tempoh maksimum hukuman penjara</i>
<i>melebihi enam bulan tetapi tidak melebihi dua tahun</i>	<i>enam bulan</i>
<i>melebihi dua tahun</i>	<i>satu perempat daripada tempoh maksimum</i>

(ii) Jika kesalahan itu tidak boleh dihukum penjara -

<i>Jika denda</i>	<i>Tempoh tidak boleh melebihi</i>
-------------------	------------------------------------

<i>tidak melebihi \$100</i>	<i>30 hari</i>
<i>melebihi \$100 tetapi tidak melebihi \$250</i>	<i>dua bulan</i>
<i>melebihi \$250 tetapi tidak melebihi \$500</i>	<i>empat bulan</i>
<i>Melebihi \$500</i>	<i>enam bulan</i>

Sementara itu, dalam bab 196(1) menyatakan seperti berikut:

hukuman penjara yang dikenakan kerana ingkar membayar denda hendaklah tamat apabila denda

*itu sama ada dibayar atau dilevi melalui proses undang-undang.*⁶¹

(2) Jika sebelum tamat nya tempoh hukuman penjara yang ditetapkan kerana ingkar membayar denda, sesuatu kadar denda itu dibayar atau dilevi hingga tempoh hukuman penjara yang dikenakan kerana ingkar membayar denda itu tidak kurang daripada bahagian denda yang masih belum dibayar, hukuman penjara itu hendaklah tamat.

Disebabkan hukuman alternatif adalah tertakluk di bawah hukuman takzir, maka bentuk-bentuk hukuman adalah tertakluk kepada pertimbangan dan budi bicara Mahkamah mengikut kesesuaian jenis kesalahan. Hukuman alternatif juga penting bagi mencapai tujuan utama perlaksanaan hukuman takzir, iaitu bagi mencegah, mengajar dan memberi pengajaran sekaligus untuk pemulihan dan pendidikan pesalah. Pencegahan yang dimaksudkan ialah mencegah pesalah dari mengulangi kesalahan yang sama di samping mencegah orang lain daripada melakukan kesalahan yang serupa.⁶²

Walau bagaimanapun keperluan terhadap hukuman berbentuk pemulihan adalah penting bagi pesalah wanita yang disabitkan kesalahan moral seperti khalwat, persetubuhan haram, hamil luar nikah dan sebagainya disebabkan mereka akan didedahkan dengan pelbagai aktiviti pemulihan yang berbentuk keagamaan, kerohanian, kemahiran dan lain-lain lagi sekaligus meningkatkan jati diri

⁶¹ Perintah Kanun Peraturan Jenayah Mahkamah Syariah, 2018 (Bil S 9, 196(1)), 196.

⁶² Hj. Mat Saad Abd. Rahman, 2008. *Isu-isu dalam Masyarakat Islam Malaysia*, Kuala Lumpur: iBook Publication Sdn. Bhd, 188-189.

dan keinsafan pesalah terbabit.⁶³ Dengan hukuman berbentuk pemulihan ini, sedikit sebanyak mampu membendung pesalah wanita daripada mengulangi kesalahan mereka. Oleh itu, adalah menjadi tanggungjawab mahkamah dalam memastikan setiap kesalahan jenayah dijatuhkan hukuman yang setimpal dan memastikan hukuman tersebut boleh dijadikan sebagai panduan kepada pesalah agar insaf dan tidak mengulangi jenayah yang sama.⁶⁴

PENUTUP

Penglibatan wanita dalam kesalahan moral di negara ini berada ditahap yang membimbangkan. Ini kerana wanita perlu menjadi contoh yang baik kepada anak-anak mereka bagi membina generasi yang beriman dan bertakwa terhindar dari ancaman kesalahan moral ini. Peningkatan kesalahan moral di kalangan wanita juga didorong oleh beberapa faktor seperti kurang penerapan ugama dalam kehidupan seharian, pengaruh daripada keadaan persekitaraan serta peruntukan undang-undang dan hukuman itu sendiri yang kurang berkesan dalam membanteras kesalahan ini sepenuhnya.

Apabila PKHJS, 2013 telah digazetkan dan dikuatkuasakan dalam undang-undang di Brunei Darussalam, peluang meluaskan lagi bentuk hukuman terhadap jenayah syariah juga semakin terbuka. Walau bagaimanapun, kebanyakan peruntukan hukuman yang diperuntukkan dalam PKHJS, 2013 ke atas kesalahan moral ini hanya denda atau penjara. Pada kebanyakan kes juga, hampir kesemua pesalah hanya dihukum dengan hukuman

⁶³ Nurul Husna Mansor *et al.*, "Pemulihan Akhlak di Pusat Perlindungan Wanita: Kajian di Baitul Ehsan dan Dar Assaadah", *Jurnal Hadhari* 9.2 (2017), 267-269.

⁶⁴ Hj. Mat Saad, *Isu-isu dalam Masyarakat Islam Malaysia*, 188-189.

denda sahaja⁶⁵, walau pada hakikatnya terdapat pilihan hukuman penjara disamping hukuman denda. Kajian mendapati bahawa amalan hukuman denda ini ada kaitan dengan peruntukan dalam Perintah itu sendiri. Kebiasaannya, hukuman denda didahulukan sebelum hukuman penjara bagi sesuatu kesalahan tertentu. Keadaan ini memberi ruang kepada para hakim menjatuhkan hukuman denda dahulu ke atas pesalah, dan jika sebaliknya pesalah gagal membayar denda barulah dia dihukum penjara selama tempoh tertentu mengikut kesalahannya.⁶⁶ Hakim juga menganggap bahawa jenayah moral seperti khalwat hanya merupakan kesalahan ringan. Oleh itu, mereka mengutamakan hukuman denda sebagai pilihan dalam kesalahan ini.⁶⁷ Dalam pada itu, latar belakang pesalah juga diambil kira dalam memutuskan hukuman terhadap mereka. Beberapa faktor telah dikenalpasti di mana hakim akan memberi pertimbangan hukuman dengan mengambilkira faktor-faktor tersebut.

Dalam hal ini juga, amalan semasa Mahkamah Syariah yang mengutamakan hukuman denda dilihat masih belum berkesan dalam menangani dan mencegah jenayah. Ini kerana masih adanya peningkatan kes-kes berkaitan kesalahan moral yang membabitkan wanita. Oleh itu, peruntukan undang-undang adalah wajar sekiranya mahkamah syariah di Brunei Darussalam mengenakan hukuman selain denda sebagai ganti atau sebagai tambahan

⁶⁵ Pengiran Dr Haji Badaruddin Pengiran Haji Abdul Rahman (Hakim Mahkamah Rendah Syariah Negara Brunei Darussalam), dalam temu bual dengan penulis, 29 Mei 2021.

⁶⁶ Anita Abdul Rahim, Adibah Abdul Rahim dan Nazura Abdul Manap, "Hukuman bagi Jenayah Seksual di Bawah Enakmen Jenayah Syariah Negeri Sembilan 1992: Keperluan kepada Hukuman yang Lebih Berat", *Jurnal Undang-Undang dan Masyarakat (JUUM)* 16, (2012), 37.

⁶⁷ Temu bual bersama Hakim-Hakim Syarie di Mahkamah Tinggi Syariah dan Mahkamah Rendah Syariah Negara Brunei Darussalam.

kepada hukuman dengan memperuntukkan hukuman alternatif yang bersesuaian bagi mengurangkan kadar kesalahan moral yang melibatkan wanita.

BIBLIOGRAFI

- Anita Abdul Rahim, Adibah Abdul Rahim dan Nazura Abdul Manap (2012), Hukuman bagi Jenayah Seksual di Bawah Enakmen Jenayah Syariah Negeri Sembilan 1992: Keperluan kepada Hukuman yang Lebih Berat, *Jurnal Undang-Undang dan Masyarakat (JUUM)* 16, 29-42.
- Haja Mydin Abdul Kuthoos, Noraida Endut, Azman Azwan Azmawati, Intan Hashimah Mohd Hashim, Nor Hafizah Selamat (2016), Penerokaan Awal Terhadap Jenayah Seksual Dalam Kalangan Remaja Lelaki di Malaysia: Satu Kajian Kes Terhadap Remaja di Sebuah Pusat Pemulihan, *3rd KANITA POSTGRADUATE INTERNATIONAL CONFERENCE*, 188-200.
- Jasri bin Jamal dan Hasnizam bin Hashim, Transformasi Mahkamah Syariah di Malaysia: Keperluan Kajian Semula Terhadap Bentuk Hukuman bagi Kes-Kes Jenayah Syariah, *'Ulum Islamiyyah Journal* 12 (2014), 87-103.
- Kamus Dewan, ed. Ke-4, (Kuala Lumpur: Dewan Bahasa dan Pustaka, 2015).
- Mahathir Yahaya, Azlinda Azman, Masarah Mohamad Yusof, Farhana Kamarul Bahrin (2019), Faktor Dalaman Yang Mendorong Perlakuan Seks Luar Nikah Dalam Kalangan Remaja, *Journal of Islamic*,

Social, Economics and Developmet (JISED), vol. 4,
issue. 23, 87-96.

Mahmood Zuhdi Ab. Majid, Bidang Kuasa Jenayah
Mahkamah Syariah di Malaysia, (Kuala Lumpur:
Dewan Bahasa dan Pustaka, 2001).

Maria Awaluddin, S., Noor Ani Ahmad, Noridah Mohd
Saleh, Tahir Aris, Noraida Mohd Kasim, Noor Azlin
Muhammad Sapri, Nik Rubiah Nik Abdul Rashid
(2015), Prevalence of Sexual Activity in Older
Malaysian Adolescents and Associated Factors,
Journal of Public Health Aspects, vol. 1, art. 1, 1-7.

Mat Saad Abd. Rahman, Isu-Isu Dalam Masyarakat Islam
Malaysia, (Kuala Lumpur: iBook Publication Sdn.
Bhd, 2008).

Mohammad Hafifi bin Hassim dan Azizah binti Mat Rashid
(2017), *Hifz al-Nasb: Analisis Terhadap Peruntukan
Kesalahan tatasusila dalam Enakmen Jenayah Syariah
di Malaysia*, *Jurnal Hal Ehwal Islam dan Warisan
Selangor*, bil.1, no. 1, 34-44.

Norjihhan Ab Aziz dan Zuraini Ab Hamid (2018), Restorative
Justice under the United Nations Resolution: Rights of
the Accused and the Victims of Crimes, *Kanun:
Jurnal Undang-undang Malaysia*, vol.30, no. 1,100-
123.

Nurul Hudani Md Nawawi dan Baharudin Othman (2018),
Konsep Moral Dalam Perspektif Islam dan Barat, *Al-
Hikmah*, jil.10, no. 2, 3-16.

Nurul Husna Mansor, Khairul Hamimah Mohammad Jodi,

Raihanah Abdullah, Fakhru Adabi Abdul Kadir (2017), Pemulihan Akhlak di Pusat Perlindungan Wanita: Kajian di Baitul Ehsan dan Dar Assaadah, *Jurnal Hadhari*, vol. 9, no.2, 261-274.

Pengiran Haji Mohammad Tashim Pengiran Haji Hassan, Mahkamah-Mahkamah Syariah Penubuhan, Bidang kuasa dan Pentadbiran, (Bandar Seri Begawan: Dewan Bahasa dan Pustaka, 2011).

Raihanah Abdullah (1998), Permasalahan Moral Masyarakat Islam Dari Perspektif Undang-Undang, *Jurnal Syariah*, vol. 6, 81-96.

Tun Abdul Hamid Mohamad (2020), Development of The Implementation of *Hudud* in Brunei, *Islam and Civilisationan Renewal Journal*, vol. 11, no. 2, 193-203.

Laman Sesawang

Laman Sesawang Pelita Brunei, Sembahyang Mencegah Kemungkaran, 25/04/2018, <https://www.pelitabrunei.gov.bn/Lists/Agama/NewDisplayForm.aspx?ID=513&ContentTypeId=0x0100F6D57A3EFF61B0428F673FEADAB5CF1E>.

Laman sesawang Media Permata, Salawati Haji Yahya, Statistik Kes Jenayah Syariah Menurun, "https://mediapermata.com.bn/statistik-kes-jenayah-syariah-menurun/".

Temu Bual

Pengiran Dr Haji Badaruddin Pengiran Haji Abdul Rahman
(Hakim Mahkamah Rendah Syariah Negara Brunei
Darussalam).

Yang Arif Haji Johar bin Haji Muhamad (Hakim Syar'ie
Mahkamah Tinggi Syariah, Negara Brunei
Darussalam).

Yang Arif Haji Hassan bin Haji Metali (Hakim Syar'ie
Mahkamah Tinggi Syariah, Negara Brunei
Darussalam).

Senarai Statut

Akta Majlis Ugama Islam dan Mahkamah-Mahkamah Kadi
Perintah Kanun Hukuman Jenayah Syariah, 2013, Bil. S 69.
Perintah Kanun Peraturan Jenayah Mahkamah Syariah,
2018, Bil. S 9.